



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Semináriu Rejionál Dili
20 Juñu 2017

**JSMP apresenta deskobrementu relatóriu anuál setór justisa no lejislativu
2016 durante semináriu rejionál ba Lideransa Komunitáriu sira kona-ba
knaar Parlamentu Nasional no Sistem Justisa formal iha Correios Dili**

Iha 16 Juñu 2017, JSMP realiza semináriu rejionál kona-ba “Knaar Parlamentu Nasional no Knaar Autór Judisiáriu iha sistema justisa formál Timor-Leste nian”, Salaun Correios, Munisípiu Dili.

Partisipante sira iha semináriu ne’e mai hosi xéfe suku sira, delegadu fetu, konsellu no lia-na’in ne’ebé kompostu hosi representante suku 18, hosi Postu Administrativu Ermera, Munisípiu Ermera no Postu Administrativu Remexiu, Munisípiu Aileu ho Postu Administrativu Maubara Munisípiu Likisa.

Totál partisipante sira ne’ebé partisipa iha semináriu ne’e ema na’in 20 kompostu hosi fetu 8 no mane na’in 12 no semináriu ne’e hetan mós kobertura hosi medía nasional sira iha Dili laran no oradór sira mai hosi Parlamentu Nasional, Tribunál, Ministériu Públiku, no Defensória Públiku.

Parlamentu Nasional representa hosi Vise-Presidenti Komisaun A, Distintu Deputadu, Sr. Arão N. de J. da C. Amaral, Tribunál representa hosi Meritíssima Juiza, Dra. Edite Parlmira, ne’ebé ko’alia kona-ba Knaar Tribunál iha Sistema Justisa Formál Timor-Leste, Ministériu Públiku representa hosi Dignísima Dra. Angelina Saldanha ne’ebé ko’alia kona-ba Knaar Ministériu Públiku no dezafiu sira no mós Defensór Públiku representa hosi Dr. Sergio Hornai, Kordenador Defensor Públiku Jerál ne’ebé koalia kona-ba kna’ar defeza nian nian ho nia dezafiu sira.

“Eventu ne’e organiza atu fasilíta kontaktu direta entre lideransa komunitariu sira ne’ebé hetan ona treinamentu hosi JSMP kona-ba órgaun soberania estadu nian inklui instituisaun relevante sira ne’ebé halao kna’ar iha setór justisa nian, atu hakle’an liutan sira nia koñesimentu nomós bele hato’o sira nia hanoin, crítica, dúvida no preokupasaun sira diretamente ba representante instituisaun relevante sira estadu nian”, dehan Diretór Ezekutivu JSMP, Luis de Oliveira Sampaio.

Antes oradores sira hato’o sira ida-idak nia topiku, JSMP hahú ho apresentasaun kona-ba faktu deskobrementu sira ne’ebé JSMP hetan durante ne’e iha PN no tribunál distritál sira no Tribunál Rekursu.

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77295795
www.jsmp.tl
luis@jsmp.minihub.org
Facebook: www.facebook.com/timorleste.jsmp
Twitter: @JSMPtl

Ne'e inklui resubliña fali kestaun sira kona-ba kuorum iha plenariu PN ka Komisaun A ne'ebé dalabarak la bele hetan tanba problema pontualidade deputadu sira nian, produtividade no kestaun kona-ba falta sein justifikasaun, no atitude deputadu sira ne'ebé halo movimentu no diskusaun keta-ketak durante plenaria sira ne'ebé afeita ba kualidade no produtividade servisu PN Nian. Aleinde ne'e JSMP mós apresenta problema sira relaciona ho intepretasaun imunidade ne'ebé laloos ho problema hirak ne'e efeitu sira komitmentu estadu atu asegura prinsipiu boa-governasaun no kombate korrupsaun. Mesmu nune'e JSMP apresia mundasa sira iha tinan 2016 nia-laran, wainhira akontese mudansa iha Meja Prezidencia Parlamentu Nasional nian.

Iha parte seluk, iha setór justisa nian, JSMP kontinua akresenta kestaun sira kona-ba orsamentu ba setor justisa ne'ebé limitadu, rekursu umanu no infra-estrutura, julgamentu iha Tribunál Rekursu ne'ebé barak liu halo deliverasaun deit no audénsia julgamentu ne'ebé la nakloke ba asesu públiku, no problema kona-ba implementasaun Lei Protesaun Testemuña ne'ebé la efetivu. Aleinde ne'e, JSMP mós foti kestaun espesifiku sira ne'ebé envolve violénsia domestika ne'ebé maioria konklui deit ho pena suspensa (66%) hosi total kazu VD ne'ebé monitoriza 2016, la iha mekanismu kontrolu efetivu ba pena suspensa ho regra ba konduta sira; no Tribunál balun la aplika orden adisional ka regra ba konduta no tribunál sira barak mak hahú tarde julgamentu no efeitu ba kulidade julgamentu sira.

Entretantu, kestaun ne'ebé partisipante sira foti mak kona-ba prosedimentu ba prosesu kazu krimi no sivíl iha tribunál relaciona ho mós legalidade utilizasaun regra kustumeiru ne'ebé konsellu suku sira uza hodi rezolve problema iha nivel suku. Partisipante sira mós ezije sosializasaun ba implementasaun Lei ba Rai no rekoifnesementu direitu anterior iha rejime espesial titularidade ba bens in moves ne'ebé la klaru. Aleinde ne'e partisipante sira mós fahe sira nia-preukupasaun kona-ba infrasaun ba Rejimentu Parlamentar kona-ba pontualidade iha oras servisu, falta sein justifikasaun no husu atu bele iha prosesu ida-ne'ebé propriu ba situasaun hirak ne'e.

Relasiona ho pergunta hirak ne'e, oradór hosi Parlamentu Nasional nian esplika katak sosializasaun ba lei sira ne'e kabe ba kompetensia governu no Parlamentu nia knaar mak atu halo fiskalizasaun. Fiskalizasaun ne'e la'os ba dezvoltamentu fizika deit, maibe inklui fiskalizasaun ba lei no politika sira nia implementasaun. Enkuantu problema rai sira ne'ebé agora akontese bele rezolve através Rejime Espesial ba Bens Imoves (Lei ba Rai). Liutan deputadu ne'e esplika katak ba kazu rai ne'ebe agora dadaun prosesu hela, husu ba aturidade sira hodi hein servisu komisaun kadastrais atu rezolve kazu okupasaun sira ne'e tuir lei mak sei termina.

Ba deputadu sira ne'ebé komete irregularidade kona-ba pontualidade, falta sein justifikasaun, Deputadu Arão Noe, dehan katak pratikamente deputadu sira nu'udar politiku halo sira nia knaar independente no tanba ne'e difisil atu kontrola. Maibe kestaun ne'e sei diskuti ho líderes bankada parlamentar sira atu iha futuro bele buka mekanismu propriu hodi fó sansaun ba membru deputadu sira ne'ebé komete iregularidade no la kumpri Estutu Deputadu nian tuir Rejimentu Parlamentu nian.

Iha parte seluk, Juiza Dra. Edit Palmira no Kordenador Defensor Publiku Jeral, Dr. Sergio Hornai, iha sira ida-idak nia reposta ba partisipante sira subliña katak iha prosesu kazu sivíl sira tribunál sei haree ba faktu sira ne'ebé apresenta hosi parte sira. Liu-liu parte sira mak tenke ativu liu hodi promove prosesu sira ne'e.

Relasiona ho direitu nain ba rai nian, tuir Juiza Palmira katak katak Rejime Espesial ba Bens Imoves fó valor no konsiderasaun ba ema sira ne'ebé hetan ona pose kleur ba rai ruma no lei ne'e defini ho klaru

kona-ba direitu ba hetan titulu hodi konsidera direitu primaria sira anterior nian. Dra. Palmira mós informa katak aforamentu iha tempu uluk kedas to’o agora iha kodigu sivíl la konverte ba direitu perfekte no direitu ba ida ne’e iha nia limitasaun masimu tinan 20 depois bele kontinua kontratu ho guvernu.

Enkuantu ba aplikasaun regra kustumeiru iha kazu krimi sira, bele uza hodi rezolve kazu ho natureza krimi semi públiku bainhira iha konkordánsia hosi parte rua hotu. Maibé se vitima hakarak prosesu nia kazu iha tribunál polisia la iha kompetensia atu delega kazu ne’e ba iha autioridade komunitaria hodi rezolve. Koandu suku sira rezolve importante maka, iha kazu sira ne’e tenki aplika tuir regras ne’ebe bele konsidera iha regras formal no desizaun ne’ebé autoridade sira halo tenke iha balansu ho prejuízu ne’ebé mosu hosi kazu ne’e. Kestaun ne’e mós reforsa liutan hosi Xefe Prokurador Distrital Dili, Dra. Angelina Saldanha.

Partisipante sira rekomenda atu programa hanesan bele hala’o iha fatin sira seluk, liu-liu komidade sira ne’ebé la dun hetan asesu ba informasaun.

Seminariu ne’e ensera ho intrega relatóriu anuál Observasun Jerál Setór Justisa 2016 no Relatóriu Anuál Parlamentu Nasionál 2016 ba Vise Prezidente Komisaun A PN, Xefe Prokurador Distrital Dili no Kordenador Defensoria Publiku Jeral.

Programa ne’e realiza tanba hetan apoiu hosi Fundu Guvernu Australia ba períodu tinan 2016-2017.

Atu hetan informasaun kle’an liu tan favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.tl